

Na osnovu člana člana 15. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09), člana 37. i člana 81. Statuta Općine Novi Grad Sarajevo („Službene novine Kantona Sarajevo“ br. 30/09 – novi prečišćeni tekst), Odluke o podsticajima u poljoprivrednoj proizvodnji (“Službene novine Kantona Sarajevo”, broj: 14/17 i 23/20), Programa podsticaja razvoja poljoprivredne proizvodnje za 2026. godinu broj: 02/03-20-9736/26 od 13.04.2026. godine, člana 28. Pravilnika o ostvarivanju prava na direktne novčane podsticaje u poljoprivrednoj proizvodnji broj: 02/03-20-17654/24 od 05.07.2024. godine i Pravilnika o izmjenama Pravilnika o ostvarivanju prava na direktne novčane podsticaje u poljoprivrednoj proizvodnji broj: 02/03-20-14747/25 od 17.6.2025. godine, Općinski načelnik na prijedlog Službe za privredu i lokalni ekonomski razvoj objavljuje:

JAVNI POZIV

za ostvarivanje prava na direktne novčane podsticaje u poljoprivrednoj proizvodnji

I. PREDMET JAVNOG POZIVA

Predmet Javnog poziva je ostvarivanje prava na direktne novčane podsticaje u poljoprivrednoj proizvodnji iz člana 2. stav 1. tačka 1. Odluke o podsticajima u poljoprivrednoj proizvodnji („Službene novine Kantona Sarajevo“, broj: 14/17 i 23/20) - direktni novčani podsticaji za tekuću poljoprivrednu proizvodnju (u daljem tekstu: Odluka) i to za:

1. Animalnu proizvodnju;
2. Biljnu proizvodnju;
3. Gljivarsku proizvodnju;
4. Certificiranje proizvodnje,
5. Investiranje u poljoprivredna gazdinstva i prerađivačke kapacitete;

II. PRAVO NA OSTVARIVANJE DIREKTNIH NOVČANIH PODSTICAJA

Pravo na ostvarivanje direktnih novčanih podsticaja imaju:

- fizička lica i lica registrovana u skladu sa Zakonom o obrtu i srodnim djelatnostima, koja imaju prebivalište na području Općine Novi Grad Sarajevo najmanje godinu dana, upisana u Registar poljoprivrednih gazdinstava i Registar klijenata u skladu sa Zakonom o poljoprivredi ("Službene novine Federacije BiH", br. 88/07, 4/10 i 7/13),
- udruženja, zadruge, nevladine organizacije, asocijacije i pravna lica **koja djeluju na području Općine Novi Grad Sarajevo** a koja su upisana u Registar poljoprivrednih gazdinstava i Registar klijenata u skladu sa Zakonom o poljoprivredi ("Službene novine Federacije BiH", br. 88/07, 4/10 i 7/13).

III. KRITERIJI ZA ODABIR KORISNIKA

Prilikom odabira korisnika za ostvarivanje prava na direktne novčane podsticaje u poljoprivrednoj proizvodnji, Komisija za dodjelu direktnih novčanih podsticaja u poljoprivrednoj proizvodnji imenovana od strane općinskog načelnika ima obavezu utvrditi da li potencijalni korisnik podsticaja ispunjava propisane kriterije i priložiti listu za dodjelu finansijskih sredstava u skladu sa Pravilnikom o ostvarivanju prava na direktne novčane podsticaje u poljoprivrednoj proizvodnji.

IV. OPĆI I POSEBNI USLOVI

Osnovni uslovi koje podnosioci zahtjeva za ostvarivanje prava na direktne novčane podsticaje u poljoprivrednoj proizvodnji treba da ispunjavaju su:

- fizička lica upisana u RPG i RK-nosioc poljoprivrednog gazdinstva i fizička lica registrovana u skladu sa Zakonom o obrtu i srodnim djelatnostima upisana u RPG i RK koja imaju mjesto prebivališta na području Općine Novi Grad Sarajevo najmanje godinu dana;
- da posjeduju zemljište za obavljanje poljoprivredne djelatnosti;
- za pravna lica, zadruge, udruženja i obrtničke djelatnosti da djeluju na području Općine Novi Grad Sarajevo;
- za pravna lica, zadruge, udruženja da su prijavljena u Jedinstveni registar poreznih obveznika;
- za pravna lica, zadruge, udruženja i fizička lica registrovana u skladu sa Zakonom o obrtu i srodnim djelatnostima da su izmirili prispjele obaveze prema Poreskoj upravi FBiH i Upravi za indirektno oporezivanje BiH.

Dopunski uslovi za ostvarivanje prava na direktne novčane podsticaje u poljoprivrednoj proizvodnji definisani su Pravilnikom o ostvarivanju prava na direktne novčane podsticaje u poljoprivrednoj proizvodnji broj: 02/03-20-17654/24 od 05.07.2024. godine i Pravilnika o izmjeni Pravilnika o ostvarivanju prava na direktne novčane podsticaje u poljoprivrednoj proizvodnji broj: 02/03-20-14747/25 od 17.6.2025. godine navedeni su uz dokumentaciju za pojedine vrste podsticaja.

V. POTREBNA DOKUMENTACIJA KOJOM SE DOKAZUJU OPĆI I POSEBNI USLOVI

Uz originalni Zahtjev za ostvarivanje prava na direktne novčane podsticaje u poljoprivrednoj proizvodnji kandidati su obavezni priložiti dokaze o ispunjavanju općih i posebnih uslova iz Javnog poziva **i to original ili ovjerene fotokopije dokumenata koje ne mogu biti starije od šest (6) mjeseci**, kako bi ispunili opće uslove:

1. Uvjerjenje o prebivalištu podnosioca zahtjeva (Obrazac PBA-4A) - za fizička lica i obrtničke djelatnosti;
2. Aktuelni izvod iz sudskog Registra - za pravna lica i zadruge;
3. Uvjerjenje o poreznoj registraciji (ID broj) - za pravna lica, zadruge i obrtničke djelatnosti;
4. Uvjerjenje Uprave za indirektno oporezivanje Bosne i Hercegovine o registraciji/upisu u Jedinstveni registar obveznika indirektnih poreza za kandidate koji su u PDV sistemu i Uvjerjenje da porezni obveznik nema dospjelih a neizmirenih obaveza, odnosno Uvjerjenje Uprave za indirektno oporezivanje Bosne i Hercegovine za lica koja nisu upisana u Jedinstveni registar obveznika indirektnih poreza da nisu u PDV sistemu;
5. Uvjerjenje o izmirenim dospjelim obavezama izdato od nadležne Porezne uprave Federacije BiH - ispostava Novi Grad Sarajevo i/ili valjan dokaz o reprogramu duga - za pravna lica, zadruge i nosioce poljoprivrednih gazdinstava - fizička lica registrovana u skladu sa Zakonom o obrtu i srodnim djelatnostima,
6. Potvrda o broju transakcijskog računa u poslovnoj banci ili Ugovor o otvaranju računa na kome je naznačen transakcijski broj računa, na kojem će se sredstva doznačiti - za sve kandidate;

7. Potvrda o upisu u Registar poljoprivrednih gazdinstava (RPG) i/ili Registar clijenata (RK) izdata od nadležne općinske Službe Općine Novi Grad Sarajevo - **službena provjera;**
8. Uvjerenje nadležne općinske službe o obavljanju djelatnosti i Rješenje o registraciji djelatnosti izdato od nadležne općinske Službe - za obrtničke djelatnosti - **službena provjera;**
9. Zemljišno knjižni izvadak (ZK) ili prepis posjedovnog lista, odnosno Ugovor o zakupu/korištenju zemljišta na period od najmanje 5 (pet) godina sa ZK izvadkom zakupodavca za sve proizvodnje, izuzev pčelarske proizvodnje, gdje kandidat mora priložiti Ugovor na period od najmanje 1 (jednu) godinu za Zk izvadkom zakupodavca;

Za ispunjavanje posebnih uslova kandidati su dužni dostaviti sljedeću dokumentaciju:

1. ANIMALNA PROIZVODNJA

1.1. Uzgoj i držanje matičnog stada muznih krava

- da posjeduje nekretninu (što se dokazuje ZK izvadkom, posjedovnim listom, ugovorom o zakupu sa ZK izvadkom zakupodavca;
- da posjeduje potvrdu o površini i lokaciji objekta u kojem je dozvoljeno držanje ili uzgoj stoke, a koju izdaje nadležna općinska služba- službena provjera;
- da posjeduje stočni pasoš za krave;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite koju izdaje nadležna veterinarska stanica – obrazac POM.

1.2. Uzgoj i držanje priplodnih junica

- da posjeduje nekretninu (što se dokazuje ZK izvadkom, posjedovnim listom, ugovorom o zakupu sa ZK izvadkom zakupodavca;
- da posjeduje potvrdu o površini i lokaciji objekta u kojem je dozvoljeno držanje ili uzgoj stoke, a koju izdaje nadležna općinska služba- službena provjera;
- da je utvrđena steonost junice od najmanje četiri mjeseca, što se dokazuje potvrdom ili uvjerenjem o gravidnosti od strane nadležne veterinarske stanice;
- da posjeduje stočni pasoš za svaku junicu na ime kandidata ili registrovanog člana gazdinstva;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite, koju izdaje nadležna veterinarska stanica – obrazac POM.

1.3. Uzgoj tovne junadi

- da posjeduje nekretninu (što se dokazuje ZK izvadkom, posjedovnim listom, ugovorom o zakupu sa sa ZK izvadkom zakupodavca);
- da posjeduje potvrdu o površini i lokaciji objekta u kojem je dozvoljeno držanje ili uzgoj stoke, a koju izdaje nadležna općinska služba- službena provjera;
- da posjeduje muški podmladak za tov i da tovi nabavljenu junad;
- da su tova junad iz vlastitog uzgoja uvedena u sistem tova do starosti maksimalno 6 mjeseci, a što se dokazuje stočnim pasošem na ime kandidata ili registrovanog člana gazdinstva;

- da posjeduje prijavu kretanja teladi kupljenih za tov, a za telad iz vlastitog uzgoja za daljnji tov obrazac A1 o obilježavanju životinja;
- da posjeduje carinsku deklaraciju i pasoše za uvezenu junad na ime kandidata ili registrovanog člana gazdinstva;
- da posjeduje pasoš za junad u tovu na ime kandidata ili registrovanog člana gazdinstva;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite, koju izdaje nadležna veterinarska stanica – obrazac POM.

1.4. Uzgoj teladi od vlastitih krava namjenjen daljem tovu

- da posjeduje nekretninu (što se dokazuje ZK izvadkom, posjedovnim listom, ugovorom o zakupu sa ZK izvadkom zakupodavca);
- da posjeduje potvrdu o površini i lokaciji objekta u kojem je dozvoljeno držanje ili uzgoj stoke, a koju izdaje nadležna općinska služba-službena provjera;
- da posjeduje krave na svom gazdinstvu od koji je uzgojio telad starosti od najmanje dva mjeseca, što se dokazuje obrascem o obilježavanju - A1 koji izdaje nadležna veterinarska stanica;
- da posjeduje stočne pasoše za telad i krave na ime kandidata ili registrovanog člana gazdinstva;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite, koju izdaje nadležna veterinarska stanica – obrazac POM.

1.5. Farma ovaca

- da posjeduje nekretninu ili da drži ovce pod nadzorom na otvorenom ograđenom prostoru, (što se dokazuje ZK izvadkom, posjedovnim listom, ugovorom o zakupu sa sa ZK izvadkom zakupodavca);
- da posjeduje potvrdu o površini i lokaciji objekta u kojem je dozvoljeno držanje ili uzgoj stoke, a koju izdaje nadležna općinska služba- službena provjera;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite, koju izdaje nadležna veterinarska stanica – obrazac POM.

1.6. Farma koza

- da posjeduje nekretninu ili da drži koze pod nadzorom na otvorenom ograđenom prostoru, (što se dokazuje ZK izvadkom, posjedovnim listom, ugovorom o zakupu sa ZK izvadkom zakupodavca);
- da posjeduje potvrdu o površini i lokaciji objekta u kojem je dozvoljeno držanje ili uzgoj stoke, a koju izdaje nadležna općinska služba-službena provjera;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite, koju izdaje nadležna veterinarska stanica – obrazac POM.

1.7. Uzgoj tovnih pilića

Podsticaj po ovoj mjeri se odnosi samo na pravna lica, zadruge i obrtničke djelatnosti-osnovna djelatnost.

- da posjeduje nekretninu (što se dokazuje ZK izvadkom, posjedovnim listom, ugovorom o zakupu sa ZK izvadkom zakupodavca;
- da posjeduje potvrdu o površini i lokaciji objekta u kojem je dozvoljeno držanje ili uzgoj tovnih pilića, a koju izdaje nadležna općinska služba - službena provjera;
- da posjeduje fakturu i fiskalni račun o nabavci jednodnevnih pilića izdatu od registrovanog proizvođača na ime podnosioca zahtjeva ili registrovanog člana gazdinstva, za godinu u kojoj se podnosi zahtjev;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite, koju izdaje nadležna veterinarska stanica – obrazac POM.

1.8. Farma koka nosilja

- da posjeduje nekretninu (što se dokazuje ZK izvadkom, posjedovnim listom, ugovorom o zakupu sa sa ZK izvadkom zakupodavca;
- da posjeduje potvrdu o površini i lokaciji objekta u kojem je dozvoljeno držanje ili uzgoj koka nosilja, a koju izdaje nadležna općinska služba ukoliko se radi o uzgoju u zatvorenom prostoru. -službena provjera;
- da posjeduje fakturu i fiskalni račun o nabavci kokoši od registrovanog proizvođača na ime podnosioca zahtjeva ili registrovanog člana gazdinstva, za godinu u kojoj se podnosi zahtjev;
- da u toku uzgoja kontinuirano provodi veterinarske mjere zdravstvene zaštite životinja, odnosno da posjeduje potvrdu o provedenim obaveznim mjerama zdravstvene zaštite, koju izdaje nadležna veterinarska stanica – obrazac POM.

1.9. Košnice pčela

- da je vlasnik zemljišta, posjednik ili da u zakupu ima poljoprivredno zemljište (što se dokazuje ZK izvadkom, posjedovnim listom ili ugovorom o zakupu, gdje podnosilac zahtjeva vrši zazimljavanje pčela);
- da posjeduje pčelinjak i drži pčelinje zajednice u skladu sa Pravilnikom o pčelarstvu („Službene novine FBiH,“ broj: 31/18) i da se pridržava istog, a što će utvrditi Komisija na licu mjesta, odnosno da održava higijenu na pčelinjaku i pri radu sa pčelama, da osigurava pčelinjim zajednicama redovnu opskrbu kvalitetnom hranom i čistom vodom, te da su košnice uredno održavane i u zadovoljavajućem stanju, što će utvrditi Komisija na licu mjesta;
- Da drži pčele na području na kojem je dozvoljeno držanje pčela- službena provjera;
- da u toku uzgoja kontinuirano provodi veterinarske mjere zdravstvene zaštite životinja, a što se dokazuje dostavljanjem veterinarskog nalaza o zdravstvenom stanju pčela od nadležne veterinarske stanice- POM.

Podsticajem nije obuhvaćena proizvodnja matica i mlada razvojna društva-nukleusi.

2. BILJNA PROIZVODNJA

2.1. Zasnivanje novih zasada voća-krošnjasto i jagodasto voće

- da je vlasnik zemljišta, posjednik ili da u zakupu ima poljoprivredno zemljište (ZK izvadak/posjedovni listi ili ugovor o zakupu zemljišta na period od najmanje 5 godina sa sa ZK izvadkom zakupodavca) na kojem je zasnovao zasad;
- da je kupio deklarirani sadni materijal i zasnovao novi zasad krošnjastog ili jagodastog voća u količini prosječnog normativa za određenu vrstu (dokazuje se fakturam/fiskalnim računom, koji ne mogu biti stariji od godinu dana od dana objavljivanja Javnog poziva, a ukoliko se radi o pisanom fiskalnom računu, potrebno je dostaviti dokaz o bezgotovinskom plaćanju po ispostavljenom pisanom računu-izvod iz banke na ime ime podnosioca zahtjeva ili registrovanog člana gazdinstva i uvjerenje Uprave za indirektno oporezivanje BiH na ime dobavljača da dobavljač nije u sistemu PDV-a i da nema neizmirene poreske obaveze;
- da posjeduje dokaz o porijeklu, zdravstvenom stanju i kvalitetu sadnog materijala, izdan od nadležne domaće institucije odnosno institucije zemlje iz koje je izvršen uvoz (dokazuje se potvrdom/uvjerenjem i sl).

2.2. Održavanje postojećih zasada krošnjastog i jagodastog voća

- da je vlasnik zemljišta, posjednik ili da u zakupu ima poljoprivredno zemljište (ZK izvadak/posjedovni list ili ugovor o zakupu zemljišta na period od najmanje 5 godina sa ZK izvadkom zakupodavca) na kojem se nalazi zasad;
- da su provedene pomotehničke i agrotehničke mjere, što na licu mjesta u postupku ostvarivanja prava na novčane podsticaje utvrđuje nadležna Komisija.

2.3. Uzgoj povrtlarskih kultura

- da je vlasnik zemljišta, posjednik ili da u zakupu ima poljoprivredno zemljište (ZK izvadak/posjedovni listi ili ugovor o zakupu zemljišta na period od najmanje 5 godina sa ZK izvadkom zakupodavca) na kojem se nalazi zasad;
- da je u agrotehničkim rokovima izvršio sjetvu i proveo odgovarajuće agrotehničke mjere, a što će utvrditi nadležna komisija na licu mjesta.

2.4. Uzgoj ratarskih kultura-krompir, pšenica, raž, ječam i heljda

- da je vlasnik zemljišta, posjednik ili da u zakupu ima poljoprivredno zemljište (ZK izvadak/posjedovni list ili ugovor o zakupu zemljišta na period od najmanje 5 godina sa sa ZK izvadkom zakupodavca) na kojem se nalazi zasad;
- da je u agrotehničkim rokovima izvršio sjetvu i proveo odgovarajuće agrotehničke mjere, a što će utvrditi nadležna komisija na licu mjesta.

2.5. Proizvodnja u zaštićenom prostoru

- da je vlasnik zemljišta, posjednik ili da u zakupu ima poljoprivredno zemljište (ZK izvadak/posjedovni list ili ugovor o zakupu zemljišta na period od najmanje 5 godina sa sa ZK izvadkom zakupodavca) na kojem je zasnovana proizvodnja u zaštićenom prostoru (plastenik, tunel, staklenik i sl.) višegodišnje namjene čija je konstrukcija zaštićena (folijom, staklom), površine ne manje od 100 m²;
- da je na zasnovanoj proizvodnji proveo odgovarajuće agrotehničke mjere koje će na osnovu zatečenog stanja zastupljene kulture utvrditi na licu mjesta nadležna Komisija.

3. GLJIVARSKA PROIZVODNJA

- da se bavi proizvodnjom gljiva na kupljenom miceliju u zatvorenom prostoru, a što će utvrditi nadležna komisija na licu mjesta;
- da je vlasnik objekta u kojem se vrši uzgoj gljiva (ZK izvadak) ili posjednik (prepis posjedovnog lista) ili da u zakupu ima proizvodni objekat (Ugovor o zakupu objekta na period od najmanje 5 godina sa ZK izvadkom zakupodavca);
- da posjeduje fakturu i fiskalni račun o kupovini komposta za svaki proizvodni ciklus ukoliko se radi na području BiH, a ukoliko se radi o kupovini van BiH dokaz o izvršenoj uplati po računu,
- kandidat treba dostaviti potvrdu izdatu od nadležne općine o posjedovanju objekta za uzgoj gljiva sa navedenom površinom i lokacijom objekta;
- dokaz o prodatim količinama gljiva (knjiga izlaznih faktura, a za lica registrovana u sistemu PDV-a i fiskalni račun), kao i dokaz o izvršenoj uplati po ispostavljenim fakturama;
- da za kompost sa micelijem posjeduje fitopatološki nalaz od nadležne institucije, za proizvodnju gljiva za svaki proizvodni ciklus.

Podsticaj na gljivarstvo će se vršiti za sve kvartale (u tekućoj godini) ostvarene do momenta podnošenja zahtjeva na Javni poziv.

4. CERTIFICIRANJE PROIZVODNJE

- da je završio proces certificiranja organske proizvodnje ili da je isti pokrenuo proces konverzije proizvodnje;
- da posjeduje potvrdu o završenom certificiranju organske proizvodnje u tekućoj godini izdata od ovlaštene certifikacijske kuće (certifikat), a za kandidate koji su u procesu konverzije potvrdu od ovlaštene certifikacijske kuće o pokrenutom certifikacijskom postupku;
- da cjelokupnim poljoprivrednim gazdinstvom upravlja u skladu sa zahtjevima, koji se primjenjuju na organsku proizvodnju u skladu sa odredbama Zakona o poljoprivrednoj organskoj proizvodnji („Službene novine Federacije BiH“, broj: 72/16) i propisa donesenih na osnovu ovog Zakona;
- da posjeduje fiskalni račun po ispostavljenoj fakturi za usluge izvršene certifikacije.

5. INVESTIRANJE U POLJOPRIVREDNA GAZDINSTVA I PRERAĐIVAČKE KAPACITETE

5.1. Nabavka nove mehanizacije, novih priključnih sredstava, nove opreme u biljnoj i animalnoj proizvodnji

- da je u godini u kojoj se raspisuje Javni poziv za novčani podsticaj kupio novu mehanizaciju, nova priključna sredstva, novu opremu u biljnoj i animalnoj proizvodnji od registrovanog proizvođača ili dobavljača, koji su porezni obveznici (u sistemu PDV-a), a izuzetno nova oprema i priključna sredstva se mogu kupiti i kod registrovanih proizvođača ili dobavljača koji nisu porezni obveznici uz uslov da se dostavi pisani fiskalni račun i dokaz o bezgotovinskom plaćanju po ispostavljenom računu (izvod iz banke na ime ime podnosioca zahtjeva ili registrovanog člana gazdinstva) i uvjerenje Uprave za indirektno oporezivanje BiH na ime dobavljača da dobavljač nije u sistemu PDV-a i da nema ne izmirenih poreskih obaveza;
- da je vlasnik zemljišta (ZK izvadak) ili posjednik (prepis posjedovnog lista) ili da u zakupu ima poljoprivredno zemljište (Ugovor o zakupu zemljišta na period od najmanje 5 godina sa ZK izvadkom zakupodavca), minimalne površine od 0,3 hektara za novu mehanizaciju i nova priključna sredstva iznad 6kW, a minimalno 1 hektara zemljišta ako aplicira za poljoprivrednu

mašinu „Traktor“, „Kombajn“, „Utovarno-pretovarna i transportna sredstva“ i drugu sličnu mehanizaciju snage preko 50 kW;

- pravna lica, zadruge, udruženja i fizička lica registrovana u skladu sa Zakonom o obrtu i srodnim djelatnostima dostaviti dokaz o izmirenim obavezama za prethodnu godinu ili sporazum o reprogramiranju duga kod Porezne uprave Federacije BiH;
- da posjeduje fiskalni račun i fakturu na ime podnosioca zahtjeva ili registrovanog člana gazdinstva o kupovini nove mehanizacije, priključnih sredstava i nove opreme u biljnoj i animalnoj proizvodnji;
- da ovjeri izjavu da će nabavljenu mehanizaciju zadržati u svom vlasništvu 5 (pet) godina, a priključna sredstva, novu opremu u biljnoj i animalnoj proizvodnji zadržati u svom vlasništvu najmanje 3 (tri) godine od dana ostvarivanja prava na novčani podsticaj, te da istu neće prodati ili dati u zakup trećim licima.

5.2. Nabavka novih plastenika i staklenika

- da je u tekućoj godini kupio novi plastenik ili staklenik od registrovanog proizvođača ili dobavljača koji su porezni obveznici (u sistemu PDV-a);
- da je plastenik ili staklenik postavljen na poljoprivrednom zemljištu za koje je zakonit korisnik (vlasnik ili posjednik) ili na zakupljenom poljoprivrednom zemljištu (ugovor o zakupu zemljišta sa ZK izvadkom zakupodavca na period ne manji od 5 godina);
- da posjeduje fakturu ili fiskalni račun na ime podnosioca zahtjeva ili registrovanog člana gazdinstva o kupovini novog plastenika ili staklenika;
- da ovjeri Izjavu da će plastenik ili staklenik koristiti isključivo na poljoprivrednom gazdinstvu, da će u istom zasnovati biljnu proizvodnju, te da ih neće prodati i davati u zakup trećim licima narednih 5 (pet) godina od dana kupovine.

5.3. Kapitalni infrastrukturni projekti

- da posjeduje odgovarajući tehničko-tehnološki projekat za objekte na koje aplicira i koje planira realizovati (idejni, glavni ili izvedbeni);
- da je vlasnik zemljišta ili objekta (ZK izvadak) ili posjednik (prepis posjedovnog lista) ili da u zakupu ima poljoprivredno zemljište ili objekat (Ugovor o zakupu zemljišta ili objekta na period od najmanje 5 (pet) godina od momenta apliciranja na Javni poziv, sa ZK izvadkom zakupodavca);
- da posjeduje fakture ili fiskalne račune na ime podnosioca zahtjeva ili registrovanog člana gazdinstva o izvedenim radovima u tekućoj godini od građevinske firme verificirane za izvođenje građevinskih i zemljanih radova;
- da posjeduje predračun/profakturu na ime podnosioca zahtjeva ili registrovanog člana gazdinstva o planiranoj investiciji. Kandidati koji ostvare pravo na dodjelu novčanih sredstava po dostavljenom predračunu/profakturi, dužni su u roku od 3 (tri) mjeseca od dana uplate sredstava od strane Općine, dostaviti nadležnoj Službi fakturu sa fiskalnim računom o izvršenim radovima po predračunu na ime podnosioca zahtjeva ili registrovanog člana gazdinstva;
- da posjeduje pravosnažno Rješenje za građenje ili rekonstrukciju objekta - građevinska dozvola, ne starija od 2 (dvije) godine, Rješenje o davanju odobrenja za dogradnju pomoćnog objekta ukoliko se objekat dograđuje, odnosno potvrdu nadležnog općinskog tijela da građevinska dozvola za to ulaganje nije potrebna;
- ukoliko je objekat namjenjen za preradu poljoprivrednih proizvoda, treba da posjeduje Rješenje o ispunjavanju veterinarsko zdravstvenih uslova u pogledu lokacije objekta i projektne dokumentacije;
- da ovjeri Izjavu kojoj navodi da je spreman sufinansirati projekat prema uslovima iz Javnog poziva, shodno ukupnoj vrijednosti projekta za koji je aplicirao;

- da ovjeri Izjavu da će odobrena finansijska sredstva utrošiti namjenski, isključivo po dostavljenom projektu, da objekat neće prodati ili dati u zakup trećim licima, niti mu promijeniti namjenu najmanje 5 (pet) godina od dana ostvarivanja prava na novčani podsticaj.

VI. IZBOR KANDIDATA ZA DODJELU DIREKTNIH NOVČANIH PODSTICAJA

Proceduru utvrđivanja liste-prijedlog kandidata za dodjelu finansijskih sredstava po objavljenom Javnom pozivu, provodi Komisija za dodjelu direktnih novčanih podsticaja u poljoprivrednoj proizvodnji, a na osnovu utvrđenih uslova u Pravilniku o ostvarivanju prava na direktne novčane podsticaje u poljoprivrednoj proizvodnji, broj: 02/03-20-17654/24 od 05.07.2024. godine i Pravilniku o izmjenama Pravilnika o ostvarivanju prava na direktne novčane podsticaje u poljoprivrednoj proizvodnji broj: 02/03-20-14747/25 od 17.6.2025. godine, do utroška sredstava utvrđenih Budžetom i Programom podsticaja razvoja poljoprivredne proizvodnje za 2026. godinu.

Komisiju za dodjelu direktnih novčanih podsticaja imenuje općinski načelnik. Zadatak Komisije je pregled prispjelih prijava i dokumentacije, obavljanje uviđaja po prijavama, utvrđivanje liste – prijedloga kandidata za dodjelu finansijskih sredstava po objavljenom Javnom pozivu.

Utvrđena lista, odnosno prijedlog kandidata za dodjelu finansijskih sredstava se dostavlja Općinskom načelniku. Svaki kandidat koji je podnio zahtjev za ostvarivanje prava na direktne novčane podsticaje na osnovu Javnog poziva može u roku od 8 (osam) dana od dana objavljivanja konačne liste podnijeti prigovor Općinskom načelniku koji donosi konačnu odluku o prigovoru.

VII. OGRANIČENJA U OSTVARIVANJU NOVČANIH PODSTICAJA

Ograničenja na ukupne novčane podsticaje za sve podnesene zahtjeve po svim tipovima poljoprivredne proizvodnje ovim Pravilnikom se ograničavaju kako slijedi:

- nosioci poljoprivrednih gazdinstava - fizička lica koja nisu registrovana u skladu sa Zakonom o obrtu i srodnim djelatnostima upisani u RPG i RK mogu ostvariti maksimalno 12.000, 00 KM novčanih podsticaja u tekućoj godini za sve podnesene zahtjeve;
- fizička lica koja su registrovana u skladu sa Zakonom o obrtu i srodnim djelatnostima (dopunsko i dodatno zanimanje) upisani u RPG i RK mogu ostvariti maksimalno 15.000, 00 KM novčanih podsticaja u tekućoj godini za sve podnesene zahtjeve;
- pravna lica i obrtničke djelatnosti-osnovno zanimanje upisani u RPG i RK mogu ostvariti maksimalno 25.000,00 KM podsticaja, za sve podnesene zahtjeve;

U slučaju velikog broja zahtjeva i prekoračenja iznosa finansijskih sredstva planiranih Programom podsticaja razvoja poljoprivredne proizvodnje za 2026. godinu broj: 02/03-20-9736/26 od 13.04.2026. godine, Komisija će uraditi Prijedlog za proporcionalno linerno umanjenje iznosa finansijskih sredstava za sve podnesene zahtjeve, a kako bi ukupna isplata ostala unutar budžetskih okvira.

VIII. PODNOŠENJE ZAHTJEVA

Zahtjevi sa priložima za dodjelu direktnih novčanih podsticaja u poljoprivrednoj proizvodnji na osnovu Javnog poziva se podnose Komisiji za dodjelu direktnih novčanih podsticaja, putem Službe za privredu i lokalni ekonomski razvoj na originalnom obrascu, koji se može preuzeti na info-punktu općine ili na web stranici Općine Novi Grad Sarajevo (<https://www.novigradsarajevo.ba/>).

Zahtjev za ostvarivanje prava na direktni novčani podsticaj podnosi nosilac porodičnog poljoprivrednog gazdinstva, za registrovano fizičko lice - ovlašteno lice, odnosno za pravna lica i zadruge direktor preduzeća ili drugo ovlašteno lice.

Za ostvarivanje prava na direktne novčane podsticaje, kandidat je dužan podnijeti pojedinačne zahtjeve za svaku vrstu proizvodnje.

Kandidat je dužan podnijeti pojedinačan zahtjev za nabavku nove mehanizacije i pojedinačan zahtjev za nabavku priključnih sredstava i nove opreme u biljnoj i animalnoj proizvodnji, osim za mehanizaciju čija pogonska mašina ne prelazi 7 kw a uz to su nabavljena i priključna sredstva za istu (plug, točkovi i sl.).

Za nabavku plastenika/staklenika sa opremom za navodnjavanje istog, kandidat podnosi jedan zahtjev.

Javni poziv će biti objavljen u sredstvima javnog informisanja, na oglasnoj ploči Općine Novi Grad Sarajevo i web stranici Općine: www.novigradsarajevo.ba padajući meni Aktuelnosti - Javni Pozivi.

Sve dodatne informacije mogu se dobiti u Službi za privredu i lokalni ekonomski razvoj Općine Novi Grad Sarajevo na brojeve telefona: 060/333-64-29, 033/291-114, 291-184, 291-253, 291-293 ili Udruženju poljoprivrednika Novi Grad Sarajevo na telefon: 061/703-424

Javni poziv ostaje otvoren 21 dan od dana objavljivanja u dnevnim novinama.

Po ovlaštenju općinskog načelnika

Emir Dedović, dipl.ecc



Broj: 02/03-20-13019/26

Sarajevo, 20.05. 2026. godine

Dostaviti:

1. Služba kabineta općinskog načelnika,
2. Služba za privredu i lokalni ekonomski razvoj,
3. Arhiva